

白氏長慶集

白氏文集卷第六十六

律詩 凡一百首

從同州刺史改授太子少傅

承華東署三分務履道西池七過春歌酒

優遊聊卒歲園林蕭灑可終身留侯爵秩

誠虛貴䟽受生涯未苦貧月俸百千官二

品朝迂雇我作閑人

奉和裴令公新成午橋莊綠野堂即

事

舊逕開桃李新池鑿鳳凰只添丞相閣不
改午橋在遠處塵埃少閑中日月長青山
爲外屏綠野是前堂引水多隨勢栽松不
趁行年華翫風景春事看農桑花妬謝家
妓蘭偷荀令香遊絲飄酒席瀑布濺琴床
巢許終身隱蕭曹到老忙千年落公便進
退處中央

自題小草亭

新結一茅茨規模儉且卑土階全壘塊山

木半留皮陰合連藤架藂香近菊籬壁宜
藜杖倚門稱荻簾垂窓裏風清夜簷間月
好時留連嘗酒客句引坐禪師伴宿雙棲
鶴扶行一侍兒綠醅量盞飲紅稻約升炊
齷齪豪家笑酸寒富屋欺陶廬閑自愛顏
巷陋誰知螻蟻謀深穴鷦鷯占小枝各隨
其分足焉用有餘爲

自詠

細故隨緣盡形衰具體微闔閑僧尚鬧較

瘦鶴猶肥老遣寬裁襪寒教厚絮衣馬從
街草驤雞任喙籠飛只要天和在無令物
性違自餘君莫問何是復何非

新亭病後獨坐招李侍郎公垂

新亭未有客竟日獨何爲趁暖泥茶竈防
寒夾竹籬頭風初定後眼暗欲明時淺把
三分酒閑題數句詩應須置兩榻一榻待
公垂

閑卧寄劉同州

軟褥短屏風昏昏醉卧翁鼻香茶熟後腰
暖日陽中伴老琴長在迎春酒不空可憐
閑氣味唯欠與君同

殘酌晚食

閑傾殘酒後煖擁小爐時舞看新翻曲歌
聽自作詞魚香肥潑火飯細滑流匙除却
慵饒外其餘盡不知

喜見劉同州夢得

紫綬白髭鬚同年二老夫論心共牢落見

面且歡娛酒好携來否詩多記得無應須
爲春草五馬少踟躕

裴令公席上贈別夢得

年老官高多別離轉難相見轉難思雪銷
酒盡梁王起便是鄒枚分散時

尋春題諸家園林

聞健朝朝出乘春處處尋天供閑日月人
借好園林漸以狂爲態都無悶到心平生
身得所未省似而今

又題一絕

貌隨年老欲何如
興遇春牽尚有餘
遙見人家花便入
不論貴賤與親疎

家園三絕

滄浪峽水子陵灘
路遠江深欲去難
何似家池通小院
卧房階下挿魚竿

籬下先生時得醉
甕間吏部暫偷眠
何如家醞雙魚榼
雪夜花時長在前

鴛鴦怕捉竟難親
鸚鵡雖籠不著人
何似

家禽雙白鶴閑行一步亦隨身

老來生計

老來生計君看取白日遊行夜醉吟陶令
有田唯種秫鄧家無子不留金人間榮耀
因緣淺林下幽閑氣味深煩慮漸銷虛白
長一年心勝一年心

早春題少室東巖

三十六峯晴雪銷嵐翠生月留三夜宿春
引四山行遠草初含色寒禽未變聲東巖

最高石唯有我題名

早春即事

眼重朝眠足頭輕宿酒醒
陽光滿前戶雪水平中庭
物變隨天氣春生逐地形
北簷梅晚白東岸柳先青
葱壠抽羊角松巢墮鶴翎
老來詩更拙吟罷少人聽

歎春風兼贈李二十侍郎二絕

樹根雪盡催花發
池岸冰銷放草生
唯有鬚霜依舊白
春風於我獨無情

道場齋戒今初畢酒伴歡娛久不同不把
一盃來勸我無情亦得似春風

春來頻與李二賓客郭外同遊因贈
長句

風光引步酒開顏送老銷春嵩洛間朝踏
落花相伴出暮隨飛鳥一時還我爲病叟
誠宜退君是才臣豈合閑可惜濟時心力
在放教臨水復登山

二月二日

二月二日新雨晴草芽菜甲一時生輕衫
細馬春年少十字津頭一字行

春和令公綠野堂種花

綠野堂開占物華路人指道令公家令公
桃李滿天下何用堂前更種花

清明日登老君閣望洛城贈韓道士
風光烟火清明日歌哭悲懽城市間何事
不隨東洛水誰家又葬北邙山中橋車馬
長無已下渡舟航亦不閑塚墓纍纍人擾

擾遼東悵望鶴飛還

三月三日

畫堂三月初三日
絮撲紗窗鶯拂簷蓮子
數盃嘗冷酒
柘枝一曲試春衫
堦臨池面
勝看鏡戶映花叢
當下簾指點樓南翫新
月玉鉤素手兩纖纖

雨中聽琴者彈別鶴操

雙鶴分離一何苦
連陰雨夜不堪聞
莫教遷客孀妻聽
嗟歎悲啼詆殺君

酬鄭二司錄與李六郎中寒食日相遇同宴見贈

偶因令節會嘉賓況是平生心所親迎接
須矜疏傳老祇供莫笑阮家貧盃盤狼藉
宜親夜風景闌珊欲過春相對喜歡還悵
望同年只有此三人

喜與楊六侍御同宿

岸幘靜當明月夜匡牀閑卧落花朝二三
月裏饒春睡七八年來不早朝濁水清塵

難會合高鵬伍鷄各逍遙
眼看又上青雲去更卜同衾一兩宵

殘春詠懷贈楊慕巢侍郎

位逾三品日年過六旬時
不道官班下其如筋力衰
猶憐好風景轉重舊親知
少壯難重得歡娛且強爲興
來池上酌醉出袖中詩靜話
閑襟久閑吟放盞遲落花無限
雪殘鬢幾多絲莫說傷心事
春風酒易悲

閑居春盡

閑泊池舟靜掩扉老身慵出客來稀愁因
暮雨留教住春被殘鶯喚遣歸揭甕偷嘗
新熟酒開箱試著舊生衣冬裘夏葛相催
促垂老光陰速似飛

春盡日天津橋醉吟偶呈李尹侍郎
宿雨洗天津無泥未有塵初晴迎早夏落
照送殘春興發詩隨口狂來酒寄身水邊
行鬼弋橋上立逡巡踈傳心情老吳公政
化新三川徒有主風景屬閑人

池上逐涼二首

青苔池上銷殘暑綠樹陰前逐晚涼輕屐
單衣薄紗帽淺池平岸庫藤床簪纓恠我
情何薄泉石諳君味甚長徧問交親爲老
計多言宜靜不宜忙

窻間睡足休高枕水畔閑來上小船棹遣
禿頭奴子撥茶教纖手侍兒煎門前便是
紅塵地林外無非赤日天誰信好風清簟
上更無一事但翛然

香山避暑二絕

六月灘聲如猛雨香山樓北暢師房夜深
起凭欄干立滿耳潺湲滿面涼

紗巾草履竹疎衣晚下香山蹋翠微一路
涼風十八里卧乘籃輦睡中歸

老夫

七八年來遊洛都三分遊伴二分無風前
月下花園裏處處唯殘个老夫世事勞心
非富貴人生實事是歡娛誰能逐我來閑

坐時共酣歌傾一壺

香山下卜居

老須爲老計老計在抽簪山下初投足人
間久息心亂藤遮石壁絕澗護雲林若要
深藏處無如此處深

無長物

莫訝家居窄無嫌活計貧只緣無長物始
得作閑人青竹單床簟烏紗獨幅巾其餘
皆稱是亦足奉吾身

宿香山寺酬廣陵牛相公見寄

手札八行詩一篇無由相見但依然君匡
聖主方行道我事空王正坐禪支許徒思
遊白月夔龍未放下青天應須且爲蒼生
住猶去懸車十四年

以詩代書寄戶部楊侍郎勸買東鄰
王家宅

勸君買取東鄰宅與我衡門相並開雲映
嵩峯當戶牖月和伊水入池臺林園亦要

聞閑置筋力應須及健迴莫學因循白賓
客欲年六十始歸來

贈談君

上客清談何亹亹幽人閑思自寥寥請君
休說長安事膝上風清琴正調

初入香山院對月 大和六年秋作
老住香山初到夜秋逢白月正圓時從今
便是家山月試問清光知不知

題龍門堰西澗

東岸菊叢西岸柳柳陰烟合菊花開一條
秋水瑠璃色闊狹纔容小舫迴除却悠悠
白少傳何人解入此中來

秋霖中奉裴令公見招早出赴會馬
上先寄六韻

雨暗三秋日泥深一尺時老人平旦出自
問欲何之不是尋醫藥非干送別離素書
傳好語絳帳赴佳期續借桃花馬催迎楊
柳姬只愁張錄事罰我恠來遲

嘗酒聽歌招客

一甕香醪新揷菊雙鬟小妓薄能謳管絃
漸好新教得羅綺雖貧免外求世上貪忙
不覺苦人間除醉即須愁不知此事君知
否君若知時從我遊

八月三日夜作

露白月微明天涼景物清
草頭珠顆冷樓角玉鉤生
氣爽衣裳健風疎砧杵鳴
夜衾香有思秋簟冷無情
夢短眠頻覺宵長起

暫行燭凝臨曉影蟲怨欲寒聲
槿老花先盡蓮凋子始成
四時無了日何用歎衰榮
病中贈南鄰覓酒

頭痛牙疼三日卧妻看煎藥
婢來扶今朝似按擡頭語
先問南鄰有酒無

曉眠後寄楊戶部

軟綾罽褥薄絛被涼冷秋天穩
暖身一覺曉眠殊有味
無因寄與早朝人

秋雨夜眠

涼冷三秋夜安閑一老翁卧遲燈滅後睡
美雨聲中灰宿溫瓶火香添暖被籠曉晴
寒未起霜葉滿階紅

喜夢得自馮翊歸洛兼呈令公

上客新從左輔迴高陽興助洛陽才已將
四海聲名去又占三春風景來甲子等頭
憐共老文章敵手莫相猜鄒枚未用爭詩
酒且飲梁王賀喜盃

齋戒滿夜戲招夢得

紗籠燈下道場前
白日持齋夜坐禪
無復更思身外事
未能全盡世間緣
明朝又擬親盃酒
今夕先聞理管絃
方丈若能來問疾
不妨兼有散花天

和令公問劉賓客歸來稱意無之作
水南秋一半風景未蕭條
皂蓋迴沙苑藍輦上洛橋
閑嘗黃菊酒醉唱紫芝謠
稱意那勞問請錢不早朝

酬夢得窮秋夜坐即事見寄

焰細燈將盡聲遙漏正長
老人秋向火小女夜縫裳
菊悴籬經雨萍銷水得霜
今冬暖寒酒先擬共君嘗

偶於維陽牛相公處覓得箏箏未到
先寄詩來走筆戲答

楚匠饒巧思秦箏多好音
如能惠一面何啻直雙金玉柱
調須品朱絃染要深
會教魔女弄不動是禪心

荅夢得秋庭獨坐見贈

林梢隱映夕陽殘
庭際蕭疎夜氣寒
霜草欲枯虫思急
風枝未定鳥棲難
容衰見鏡同惆悵
身健逢盃且喜歡
應是天教相煖熱
一時垂老與閑官

長齋月滿攜酒先
與夢得對酌醉中
同赴令公之宴戲
贈夢得

齋宮前日滿三旬
酒榼今朝一拂塵
乘興還同訪戴客
解醒仍對姓劉人
病心湯沃寒灰活
老面花生朽木春
若怕平原恠先

醉知君未慣吐車茵

奉酬淮南牛相公思黯見寄二十四

韻

白老忘機客牛公濟世賢
鷗棲心戀水鵬舉翅摩天
累就優閑秩連操造化權
貧司甚蕭灑榮路自喧闐
望苑三千日台階十五年
是人皆企望何物不陶甄
籃輦遊嵩嶺油幢鎮海壖
竹篙撐釣艇金甲擁樓船
雪夜尋僧舍春朝列妓筵
長齋儼香火密

宴簇花鈿自覺閑勝開遙知醉笑禪是非
分未定會合杳無緣我正思楊府君應望
洛川西來風嫋嫋南去鴈連連日落龍門
外潮生瓜步前秋同一時盡月共兩鄉圓
舊眷交歡在新文氣調全慙無白雪曲難
答碧雲篇金谷詩誰賞蕪城賦衆傳珠應
哂魚目鉛未伏龍泉遠計驚魔物深情寄
酒錢霜紈一百疋玉柱十三絃楚醴來樽
裏秦聲送耳邊何時紅燭下相對一陶然

吳必監每有美酒獨酌獨醉但蒙詩
報不以飲招輒此戲酬兼呈夢得

逢山仙客下烟霄對酒唯吟獨酌謠不怕
道狂揮玉爵亦曾乘興換金貂君稱名士
誇能飲我是愚夫肯見招賴有伯倫爲醉
伴何愁不解傲松喬

酬夢得霜夜對月見懷

淒清冬夜景搖落長年情月帶新霜色碁
和遠鴈聲暖憐爐火近寒覺袂衣輕枕上

酬佳句詩成夢不成

初冬月夜得皇甫澤州手札并詩數
篇因遣報書偶題長句

清泠玉韻兩三章
落泊銀鉤七八行
心逐報書懸鴈足
夢尋來路遶羊腸
水南地空多明月
山北天寒足早霜
最恨潑醅新熟酒
迎冬不得共君嘗

雪中酒熟欲攜訪
吳監先寄此詩

新雪對新酒
憶同傾一盃
自然須訪戴不

必待延枚陳榻無辭解
衮門莫懶開笙歌
與談笑隨事自將來

酬令公雪中見贈訝不與夢得同相訪

雪似鵝毛飛散亂人被鶴氅立徘徊
鄒生枚叟非無興唯待梁王召即來

題酒甕呈夢得

若無清酒兩三甕爭向白鬚千萬莖
麴蘖銷愁真得力先陰催老苦無情
凌烟閣上

功無分伏火爐中藥未成更擬共君何處
去且來同作醉先生

迂叟

一辭魏闕就商賔散地閑居八九春初時
被目爲迂叟近日蒙呼作隱人冷暖俗情
諳世路是非閑論任交親應須繩墨機關
外安置踈愚鈍滯身

洛下閑居寄山南令狐相公

已收身向園林下猶寄名於祿仕間不鍛

嵇康彌懶靜無金疏傳更貧閑支分門內
餘生計謝絕朝中舊往還唯是相君未忘
得時思漢水夢巴山

惜春贈李尹

春色有時盡公門終日忙兩衙但不闕一
醉亦何妨芳樹花園雪衰翁鬢撲霜知君
倚年少未苦惜風光

對酒勸令公開春遊宴

時泰歲豐無事日功成名遂自由身前頭

更有忘憂目向上應無快活人自去年來
多事故從今日去少交親宜須數數謀歡
會好作開成第二春

與夢得偶同到敦詩宅感而題壁

山東纔副蒼生願川上俄驚逝水波履道
淒涼新第宅宣城零落舊笙歌園荒唯有
新堪採門冷兼無雀可羅今日相隨偶同
到傷心不是故經過

楊六尚書新授東川節度使代妻戲

賀兄嫂二絕

劉綱與婦共升仙
弄玉隨夫亦上天
何似沙哥領崔嫂
碧油幢引向東川

金花銀枕饒君用
罨畫羅衣盡嫂裁
覓得黔婁爲妹壻
可能空寄蜀茶來

閑遊即事

郊野遊行熟村園
次第過驀山尋澗
踏水渡伊河寒食
青青草春風瑟瑟
波逢人共盃酒隨
馬有笙歌勝事經
非少芳辰過

亦多還須自知分不老擬如何

六十六

七十欠四歲此生那足論每因悲物故還
且喜身存安得頭長黑爭教眼不昏交遊
成拱木婢僕見曾孫瘦覺鬢金重衰憐鬢
雪繁將何理老病應付與空門

池上早春即事招夢得

老更驚年改閑先覺日長晴薰榆莢黑春
染柳梢黃雪破山呈色冰融水放光伍平

穩船舫輕暖好衣裳白角三升榼紅茵六
尺牀偶遊難得伴獨醉不成狂我有中心
樂君無外事忙經過莫慵懶相去兩三坊
因夢得題公垂所寄蠟燭因寄公垂
照梁初日光相似出水新蓮艷不如却寄
兩條君領取明年雙引入中書

令公南莊花柳正盛欲偷一賞先寄
二篇

最憶樓花千萬朵偏憐堤柳兩三株擬提

社酒攜村妓擅入朱門莫恠無
可惜亭臺閑度日欲偷風景暫遊春只愁
花裏鶯饒舌飛入宮城報主人

春夜宴席上戲贈裴淄州

九十不衰真地仙六旬猶健亦天憐今年
相遇鶯花月此夜同歡歌酒筵四座齊聲
和絲竹兩家隨分鬪金鈿留君到曉無他
意圖向君前作少年

贈夢得

年顏老少與君同
眼未全昏耳未聾
放醉卧爲春日伴
趁歡行入少年叢
尋花借馬煩川守
弄水偷船惱令公
聞道洛城人盡恠
呼爲劉白二狂翁

晚春欲攜酒尋沈
四著作先以六韻
寄之

病容衰慘澹芳景
晚蹉跎無計留春
得爭能奈老何
篇章慵報答
杯讌喜經過
顧我酒狂人負君
詩債多敢辭攜綠
蟻只願見

青娥最憶陽關唱真珠一串歌

開成二年三月三日河南尹李待價
以人和歲稔將楔於洛濱前一日啓
留守裴令公公明日召太子少傅白
居易太子賓客蕭籍李仍叔劉禹錫
前中書舍人鄭居中國子司業裴惲
河南少尹李道樞倉部郎中崔晉司
封貲外郎張可績駕部貲外郎盧言
虞部貲外郎苗愔和州刺史裴儔淄

州刺史裴洽檢校禮部員外郎楊魯
士四門博士談弘謩等一十五人合
宴于舟中由斗亭歷魏堤扞津橋登
臨沂沿自晨及暮簪組交映歌笑間
發前水嬉而後妓樂左筆硯而右壺
觴望之若仙觀者如堵盡風光之賔
極遊泛之娛美景良辰賞心樂事盡
得於今日矣若不記錄謂洛無人晉
公首賦一章鏗然玉振顧謂四座繼

而和之居易舉酒抽毫奉十二韻以獻

三月草萋萋黃鸝歇又啼柳橋晴有絮沙
路潤無泥快事修初畢遊人到欲齊金鈿
耀桃李絲管駭鳬鷺轉岸迴船尾臨流簇
馬蹄鬧於楊子渡踏破魏王堤妓接謝公
宴詩陪荀令題舟同李膺汎醴爲穆生携
水引春心蕩花牽醉眼迷塵街從鼓動烟
樹任鴉棲舞急紅靨凝歌遲翠黛佷夜歸

何用燭新月鳳樓西

同夢得寄賀東西川二楊尚書

龍節對持真可愛鴈行相接更堪誇兩川
風景同三月千里江山屬一家魯衛定知
聯氣色潘揚亦覺有光華應憐洛下分司
伴冷宴閑遊老看花

喜小樓西新柳抽條

一行弱柳前年種數尺柔條今日新漸欲
拂他騎馬客未多遮得上樓人須教碧玉

羞眉黛莫與紅桃作麴塵爲報金堤千萬
樹饒伊未敢苦爭春

晚春酒醒尋夢得

料合同惆悵花殘酒亦殘醉心忘老易醒
眼別春難獨出雖慵懶相逢定喜懽還携
小蠻去誠覓老劉看

感事

眼氣崔常侍燒丹鄭舍人常期生羽翼那
忽化灰塵每遇淒涼事還思潦倒身唯知

趁盃酒不解鍊金銀睡適三尸性慵安五
藏神無憂亦無喜六十六年春

和裴令公南莊一絕

陶廬僻陋那堪比謝墅幽微不足攀何似
嵩峯三十六長隨申甫作家山

宅西有流水墻下構小樓臨翫之時
頗有幽趣因命歌酒聊以自娛獨醉
獨吟偶題五絕

伊水分來不自由無人解愛爲誰流家家

拋向墻根底唯我栽蓮起小樓

水色波文何所似麴塵羅帶一條斜莫言
羅帶春無主自置樓來屬白家

日灩水光搖素壁風飄樹影拂朱欄皆言
此處宜絃管試奏霓裳一曲看

霓裳奏罷唱梁州紅袖斜翻翠黛愁應是
遙聞勝近聽行人欲過盡迴頭

獨醉還須得歌舞自娛何必要親賓當時
一部清商樂亦不長將樂外人

偶作

藍舁出即忘歸舍柴戶昏猶未掩關聞客
病時慙體健見人忙處覺身閑清涼秋寺
行香去和煖春城拜表還木鴈一篇須記
取致身才與不才間

同夢得訓牛相公初到洛中小飲見
贈

淮南揮手拋紅旆洛下迴頭向白雲政事
堂中老丞相制科場裏舊將軍宮城烟月

饒全占關塞風光請中分詩酒放狂猶得
在莫欺白叟與劉君

幽居早秋閑詠

岸僻蹢塵外清涼水木間卧風秋拂簟步
月夜開闕且得身安泰從他世險艱但休
爭要路不必入深山軒鶴留何用泉魚放
不還誰人知此味臨老十年間

和令狐僕射小飲聽阮咸

掩抑復淒清非琴不是箏還彈樂府曲別

相尋去挈榼抱衾同醉眠

冬夜對酒寄皇甫十

霜殺中庭草冰生後院池有風空動樹無
葉可辭枝十月苦長夜百年強半時新開
一瓶酒那得不相思

歲除夜對酒

哀翁歲除夜對酒思悠然草白經霜地雲
黃欲雪天醉依香枕坐慵傍暖爐眠洛下
閑來久明朝是十年

白氏文集卷第六十七

律詩 凡七十五首

司徒令公分守東洛移鎮北都一心
勤王三月成政形容盛德實在歌詩
况辱知音敢不先唱輒奉五言四十
韻寄獻以抒下情

天上中台正人間一品高休明值堯舜勲
業過蕭曹始擅文三捷終兼武六韜動人
名赫赫憂國意忉忉盪蔡擒封豕平齊斬

臣鼇兩河收土宇四海定波濤寵重移宮
籥恩新換閫旄保釐東宅靜守護北門牢
晉國封疆闊并州士馬豪胡兵驚赤幟邊
鴈避烏號今下流如水仁霑澤似膏路喧
歌五袴軍醉感單醪將校森貔虎賓僚儼
隼髦客無煩夜析吏不犯秋毫神在駑駘
助魂亡獫狁逃德星銷彗孛霖雨洗腥臊
烽戍高臨代關河遠控洮汾雲晴漠漠朔
吹冷颼颼豹尾交衙戟蚪鬚捧佩刀通天

白犀帶照地紫麟袍羗管吹楊柳燕姬酌
蒲萄銀含鑿落盞金屑琵琶槽遙想從軍
樂應忘報國勞紫微留北闕綠野寄東臯
忽憶前時會多慙下客叨清宵陪讌話美
景從遊遨花月還同賞琴詩雅自操朱絃
拂宮徵洪筆振風騷近竹開方丈依林架
桔槔春池八九曲畫舫兩三舸逕滑苔粘
屐潭深水沒篙綠絲縈岸柳紅粉映樓桃
爲穆先陳醴招劉共籍糟舞鬟金翡翠歌

頸玉螭螭盛德終難遇明時豈易遭公雖
慕張范帝未捨伊臯眷戀心方結踟躕首
已搔鸞鳳上寥廓鸞雀住蓬蒿欲獻文狂
簡徒煩思鬱陶可憐四百字輕重抵鴻毛

和東川楊慕巢尚書府中獨坐感戚
在懷見寄十四韻

我是知君者君今意若何窮通時不定苦
樂事相和東蜀歡殊渥西江歎逝波只緣
榮貴極翻使感傷多行斷風驚鴈年侵日

下坡片心休慘戚雙鬢已蹉跎紫綬黃金
印青幢白玉珂老將榮補帖愁用道銷磨
外府饒盃酒中堂有綺羅應須引滿飲何
不放狂歌緜水通巴峽香山對洛河將軍
馳鍔馬少傳步銅駝深契憐松竹高情憶
薜蘿懸車年甚遠未敢放相過

分司洛中多暇數與諸客宴遊醉後
狂吟偶成十韻因招夢得賓客兼呈
思黯奇章公

性與時相遠身將世兩忘
寄名朝士籍寓興少年場
老豈無談笑貪猶有酒漿
隨時求伴侶逐日用風光
數數遊何爽些些病未妨
天教榮啓樂人恕接輿狂
改業爲逋客移家住醉鄉
不論招夢得兼擬誘奇章
要路風波險權門市井忙
世間無可戀不
是不思量

小歲日喜談氏外孫女孩滿月

今旦夫妻喜他人豈得知
自嗟生女晚敢

訝見孫遲物以稀爲貴情因老更慈新年
逢吉日滿月乞名時桂燎熏花果蘭湯洗
玉肌懷中有可抱何必是男兒

閑吟贈皇甫郎中親家翁

誰能嗟歎光陰暮豈復憂愁活計貪忽忽
不知頭上事時時猶憶眼中人早爲良友
非交勢晚接嘉姻不失親最喜兩家婚嫁
畢一時抽得尚平身

夢得卧病攜酒相尋先以此寄

病來知少客誰可以爲娛日晏開門未秋
寒有酒無自宜相慰問何必待招呼小疾
無妨飲還須挈一壺

訓思黯戲贈

鍾乳三千兩金釵十二行妬他心似火欺
我鬢如霜慰老資歌笑銷愁仰酒漿眼看
狂不得狂得且須狂

又戲答絕句

狂夫與我世相忘故態些些亦不妨縱酒

放歌聊自樂接輿爭解教人狂

令狐相公與夢得交情素深眷予分
亦不淺一聞薨逝相顧泫然旋有使
來得前月未歿之前數日書及詩寄
贈夢得哀吟悲歎寄情於詩詩成示
予感而繼和

緘題重疊語殷勤存歿交親自此分前月
使來猶理命今朝詩到是遺文銀鈎見晚
書無報玉樹埋深哭不聞最感一行絕筆

字尚言千萬樂天君

洛下雪中頻與劉李二賓客宴集因
寄汴州李尚書

水南水北雪紛紛雪裏歡遊莫厭頻日日
暗來唯老病年年少去是交親碧氍毹暖
梅花濕紅燎爐香竹葉春今日鄒枚俱在
洛梁園置酒召何人

看夢得題答李侍郎詩詩中有文星
之句因戲和之

看題錦繡報瓊瓊俱是人天第一才好遣
文星守躔次亦須防有客星來

閑適

祿俸優饒官不卑就中閑適是分司風光
暖助遊行處雨雪寒供飲宴時肥馬輕裘
還粗有寵歌薄酒亦相隨微躬所要今皆
得只是蹉跎得校遲

戲答思黯

何時得見十三絃待取無雲有月天願得

金波明似鏡鏡中照出月中仙

訓裴令公贈馬相戲

安石風流無奈何欲將赤驥換青娥不辭
便送東山去臨老何人與唱歌

新歲贈夢得

暮齒忽將及同心私自憐漸衰宜減食已
喜更加年紫綬行聯袂藍輦出比肩與君
同甲子歲酒合誰先

早春持齋答皇甫十見贈

正月晴和風景新紛紛已有醉遊人帝城
花笑長齋客二十年來負早春

戲贈夢得兼呈思黯

雙鬢莫欺今老矣一盃莫笑便陶然陳郎
中處爲高戶裴使君前作少年顧我獨狂
多自哂與君同病最相憐月終齋滿誰開
素須詎奇章置一筵

早春憶遊思黯南莊因寄長句

南莊勝處心常憶借問軒車早晚遊美景

難忘竹廊下好風爭柰柳橋頭冰消見水
多於地雪霽看山盡入樓若待春深始同
賞鶯殘花落却堪愁

訓皇甫十早春對雪見贈

漠漠復雰雰東風散玉塵明催竹窓曉寒
退柳園春綠醕香堪憶紅爐暖可親忍心
三兩日莫作破齋人

奉和思黯自題南莊見示兼呈夢得
謝家別墅最新奇山展屏風花夾籬曉月

漸沈橋脚底晨光初照屋梁時
臺頭有酒鸞呼客水面無塵風洗池
除却吟詩兩閑客此中情狀更誰知

送蘄春李十九使君赴郡

可憐官職好文詞五十專城未是遲
曉日鏡前無白髮春風門外有紅旗
郡中何處堪携酒席上誰人解和詩
唯共交親開口笑知君不及洛陽時

自題酒庫

野鶴一辭籠虛舟長任風送愁還闌處移
老入閑中身更求何事天將富此翁此翁
何處富酒庫不會空

寒食日寄楊東川

不知楊六逢寒食作底歡娛過此辰兜率
寺高宜望月嘉陵江近好遊春蠻旗似火
行隨馬蜀妓如花坐遶身不使黔婁夫婦
看誇張富貴向何人

醉後聽唱桂華曲

桂華詞意苦丁寧唱到常娥醉便醒此是
世間腸斷曲莫教不得意人聽

訓夢得以子五月長齋延僧徒絕賓
友見戲十韻

賓客懶逢迎脩然池館清簷閑空鶯語林
靜未蟬鳴葦血還休食盃觴亦罷傾三春
多放逸五月暫修行香印朝烟細紗燈夕
焰明交遊諸長老師事古先生禪後心彌
寂齋來體更輕不唯忘肉味兼擬減風情

蒙以聲聞待難將戲論爭虛空若有佛靈
運恐先成

奉和裴令公三月上巳日遊大原龍
泉憶去歲楔洛見示之作

去歲暮春上巳共泛洛水中流今歲暮春
上巳獨立香山下頭風光閑寂寂旌旆遠
悠悠丞相府歸晉國太行山礙并州鵬背
負天龜曳尾雲泥不可得同遊

又和令公新開龍泉晉水二池

舊有潢污泊今爲白水塘笙歌聞四面樓閣在中央春變烟波色晴添樹木光龍泉信爲美莫忘午橋莊

早夏曉興贈夢得

窻明簾薄透朝光卧整巾簪起下牀背壁燈殘經宿焰開箱衣帶隔年香無情亦任他春去不醉爭銷得日長一部清商一壺酒與君明日暖新堂

春日題乾元寺上方最高峯亭

危亭絕頂四無鄰見盡三千世界春但覺
虛空無障礙不知高下幾由旬迴看官路
三條線却望都城一片塵賓客暫遊無半
日王侯不到便終身始知天造空閑境不
爲奔忙富貴人

奉和思黯相公以李蘇州所寄太湖
石奇狀絕倫因題二十韻見示兼呈
夢得

錯落復崔嵬蒼然玉一堆峯駢仙掌出罅

坼劍門開峭頂高危矣盤根下壯哉精神
欺竹樹氣色壓亭臺隱起磷磷狀凝成瑟
瑟胚廉稜露鋒刃清越扣瓊瑰岌業形將
動巍哉勢欲摧奇應潛鬼恠靈合蓄雲雷
黛潤霑新雨班明點古苔未曾棲鳥雀不
肯染塵埃尖削琅玕笋窪剜馬瑙壘海神
移碣石盡障蕨天台在世爲尤物如人負
逸才渡江一葦載入洛五丁推出處雖無
意升沉亦有媒拔從水府底置向相庭隈

對稱吟詩句看宜把酒盃終隨金礪用不
學玉山頽䟽傳心偏愛園公眼屢迴共嗟
無此分虛管太湖來

奉和思黯相公雨後林園四韻見示
新晴夏景好復此池邊地烟樹綠含滋水
風清有味便成林下隱都望門前事騎吏
引歸軒始知身富貴

晚夏閑居絕無賓客欲尋夢得先寄
此詩

魚笋朝飧飽蕉紗暑服輕欲爲牕下寢先
傍水邊行晴引鶴雙舞秋生蟬一聲無人
解相訪有酒共誰傾老更諳時事閑多見
物情只應劉與白二叟自相迎

寄李蘄州

下車書奏龔黃課動筆詩傳鮑謝風江郡
謳謠誇杜母洛城歡會憶車公笛愁春盡
梅花裏簾冷秋生蘼葉中不道蘄州歌酒
少使君難稱與誰同

憶江南詞三首

江南好風景舊曾諳日出江花紅勝火春
來江水綠如藍能不憶江南

江南憶最憶是杭州山寺月中尋桂子郡
亭枕上看潮頭何日更重遊

江南憶其次憶吳宮吳酒一盃春竹葉吳
娃雙舞醉芙蓉早晚復相逢

訓思黯相公晚夏雨後感秋見贈

暮去朝來無歇期炎涼暗向雨中移夜長

祇合愁人覺秋冷先應瘦客知兩幅彩牋
揮逸翰一聲寒玉振清辭無憂無病身榮
貴何故沈吟亦感時

久雨閑悶對酒偶吟

淒淒苦雨暗銅駝嫋嫋涼風起漕河自夏
及秋晴日少從朝至暮悶時多鷺臨池立
窺魚笥隼傍林飛拂雀羅賴有盃中神聖
物百憂無奈十分何

雨後秋涼

夜來秋雨後秋氣颯然新團扇先辭手生
衣不著身更添砧引思難與簾相親此境
誰偏覺貧閑老瘦人

訓夢得早秋夜對月見寄

吾衰寡情趣君病懶經過其柰西樓上新
秋明月何庭蕪凝白露池色澹金波況是
初長夜東城砧杵多

題謝公東山障子

賢愚共在浮生內貴賤同趨群動間多見

忙時已衰病少聞健日肯休閑鷹飢受縛
從難退鶴老乘軒亦不還唯有風流謝安
石拂衣攜妓入東山

謝楊東川寄衣服

年年衰老交遊少處處蕭條書信稀唯有
巢兄不相忘春茶未斷寄秋衣

詠懷寄皇甫朗之

老大多情足往還招僧待客夜開關學調
氣後衰中健不用心來鬧處閑養病未能

辭薄俸忘名何必入深山與君別有相知
分同置身於木鴈間

東城晚歸

一條邛杖懸龜榼雙角吳童控馬銜晚入
東城誰識我短靴促帽白蕉衫

與夢得沽酒閑飲且約後期

少時猶不憂生計老後誰能惜酒錢共把
十千沽一斗相看七十欠三年閑徵稚子
窮經史醉聽清吟勝管絃更待菊黃家醞

熟共君一醉一陶然

與牛家妓樂雨夜合宴

玉管清絃聲旖旎翠釵紅袖坐參差兩家
合奏洞房夜八月連陰秋雨時歌臉有情
凝睇久舞腰無力轉裙遲人間歡樂無過
此上界西方即不知

和楊六尚書喜兩弟漢公轉吳興魯
士賜章服命賓開宴用慶恩榮賦長
句見示

華筵賀客日紛紛
劍外歡娛洛下聞
朱紱寵光新照地
彤襜喜氣遠凌雲
榮聯花萼詩難和
樂助埴簫酒易醺
感羨料應知我意
今生此事不如君

自詠

鬚白面微紅
醺醺半醉中
百年隨手過
萬事轉頭空
卧疾瘦居士
行歌狂老翁
仍聞好事者
將我畫屏風

夢得相過援琴命酒因彈秋思偶詠

所懷兼寄繼之待價二相府

閑居靜侶偶相招小飲初酣琴欲調我正
風前弄秋思君應天上聽雲韶時和始見
陶鈞力物遂方知盛聖朝雙鳳栖梧魚在
藻飛沉隨分各逍遙

九月八日訓皇甫十見贈

君方對酒綴詩章我正持齋坐道場處處
追遊雖不去時時吟詠亦無妨霜蓬舊鬢
三分白露菊新花一半黃惆悵東籬不同

醉陶家明日是重陽

幕巢尚書書云室人欲爲買置一歌
者非所安也以詩相報因而和之

東川已過二三春南國須求一兩人富貴
大都多老大歡娛太半爲親賓如愁翠黛
應堪重買笑黃金莫訴貧他日相逢一盃
酒樽前還要落梁塵

杪秋獨夜

無限少年非我伴可憐清夜與誰同歡娛

牢落中心少親故凋零四面空紅葉樹飄
風起後白鬚人立月明中前頭更有蕭條
物老菊衰蘭三兩叢

憑李睦州訪徐凝山人

郡守輕詩客鄉人薄釣翁解憐徐處士唯
有李郎中

蘇州故吏

江南故吏別來久今日池邊識我無不獨
使君頭似雪華亭鶴死白蓮枯

得楊湖州書頗誇撫民接賓縱酒題
詩因以絕句戲之

豈獨愛民兼愛客不唯能飲又能文
白蘋洲上春傳語柳使君輸楊使君

天宮閣秋晴晚望

洛城秋霽後梵閣暮登時此日風烟好
今秋節候遲霞光紅泛灩樹影碧參差
莫慮言歸晚牛家有宿期

酬夢得暮秋晴夜對月相憶

霽月光如練盈庭復滿池秋深無熱後夜
淺未寒時露葉團荒菊風枝落病梨相思
懶相訪應是各年衰

同夢得和思黯見贈來詩中先叙三
人同讌之歡次有歎鬢髮漸衰嫌孫
子催老之意因繼妍唱何兼吟鄙懷
醉伴騰騰白與劉何朝何夕不同遊留連
燈下明猶飲斷送樽前倒即休催老莫嫌
孫稚長加年須喜鬢毛秋教他伯道爭存

活無子無孫亦白頭

聽歌

管妙絃清歌入雲老人合眼醉醺醺誠知
不及當年聽猶覺聞時勝不聞

三年冬隨事鋪設小堂寢處稍似穩
暖因念衰病偶吟所懷

小宅非全陋中堂不甚卑聊堪會親族足
以貯妻兒煖帳迎冬設熅爐向夜施裘新
青兔褐褥軟白猿皮似鹿眠深草如雞宿

穩枝逐身安枕席隨事有屏帷病致衰殘
早貧營活計遲由來蠶老後方是蠶成時
初冬即事呈夢得

青氊帳煖喜微雪紅地爐深宜早寒走筆
小詩能和不否潑醅新酒試嘗看僧來乞食
因留宿客到開樽便共歡臨老交親零落
盡希君恕我取人寬

自罷河南已換七尹每一入府悵然
舊遊因宿內廳偶題西壁兼呈韋尹

常侍并贈張處士韋山人

羅襟蕙帶竹皮巾雖到塵中不染塵每見
俗人多慘澹唯逢美酒即殷勤浮雲心事
誰能會老鶴風標不可親世說三生如不
謬共疑巢許是前身

天寒晚起引酌詠懷寄許州王尚書
汝州李常侍

葉覆氷池雪滿山日高慵起未開關寒來
更亦無過醉老後何由可得閑四海故交

唯許汝十年貧健是樊蠻相思莫忘櫻桃
會一放狂歌一破顏

四年春

柳梢黃嫩草芽新又入開成第四春近日
放慵多不出少年嫌老可相親分司吉傳
頻過舍致仕崔卿擬卜鄰時輩推遷年事
到往還多是白頭人

白髮

白髮生來三十年而今鬚鬢盡皤然歌吟

終日如狂叟衰疾多時似瘦仙八戒夜持
香火印三元朝念葉珠篇其餘便被春收
拾不作閑遊即醉眠

追歡偶作

追歡逐樂少閑時補帖平生得事遲何處
花開曾後看誰家酒熟不先知石樓月下
吹蘆管金谷風前舞柳枝十聽春啼變鶯
舌三嫌老醜換蛾眉樂天一過難知分猶
自咨嗟兩鬢絲

公垂尚書以白馬見寄光潔穩善以
詩謝之

翩翩白馬稱金羈
領綴銀花尾曳絲
毛色鮮明人盡愛
性靈馴善主偏知
免將妾換慙來處
試使奴牽欲上時
不蹶不驚行步穩
最宜山簡醉中騎

西樓獨立

身著白衣頭似雪
時時醉立小樓中
路人迴顧應相恠
十一年來見此翁

書事詠懷

官俸將生計雖貧豈敢嫌金多輸陸賈酒
足勝陶潛床暖僧敷坐樓晴妓卷簾日遭
齋破用春賴閨加添老向歡彌切狂於飲
不廉十年閑未足亦恐涉無狀

酬夢得比萱草見贈

杜康能散悶萱草解忘憂借問萱逢杜何
如白見劉老衰勝少夭閑樂笑忙愁試問
同年內何人得白頭

問皇甫十

苦樂心由我窮通命任他坐傾張翰酒行
唱接興歌榮盛傍看好優閑自適多知君
能斷事勝負兩如何

早春獨登天宮閣

天宮日暖閣門開獨上迎春飲一盃無限
遊人遙恠我緣何最老最先來

送蘇州李使君赴郡二絕句

憶拋印綬辭吳郡衰病當時已有餘今日

賀君兼自喜八迴看換舊銅魚
館娃宮深春日長烏鵲橋高秋夜涼風月
不知人世變奉君直似奉吳王

長洲曲新詞

茂苑綺羅佳麗地女湖桃李艷陽時心奴
已死胡容老後輩風流是阿誰

白氏文集卷第六十八

律詩 一百首

病中詩十五首 并序

開城已未歲余蒲柳之年六十有八冬十月甲寅且始得風痺之疾體癯目眩左足不支蓋老病相乘時而至耳余早棲心釋梵浪跡老莊因疾觀身果有所得何則外形骸而內忘憂患先禪觀而後順鑒治旬月以還厥疾少閒杜門高枕澹然安閑吟

諷興來亦不能遏因成十五首題爲病中
詩且貽所知兼用自廣昔劉公幹病漳浦
謝康樂卧臨川咸有篇章抒詠其志今引
而序之者慮不知我者或加誚焉

初病風

六十八衰翁乘衰百疾攻朽株難免蠹空
穴易來風肘痺宜生柳頭旋劇轉蓬恬然
不動處虛白在胷中

枕上作

風疾侵凌臨老頭血凝筋滯不調柔甘從
此後支離卧賴是從前爛熳遊迴思往事
紛如夢轉覺餘生杳若浮浩氣自能充靜
室驚飆何必蕩虛舟腹空先進松花酒膝
冷重裝桂布裘若問樂天憂病否樂天知
命了無憂

答閑上人來問因何風疾

一床方丈向陽開勞動文殊問疾來欲界
凡夫何足道四禪天始免風灾

病中五絕

世間生老病相隨
此事心中久自知
今日行年將七十
猶須慙愧病來遲

方寸成灰鬢作絲
假如強健亦何爲
家無憂累身無事
正時安閑好病時

李君墓上松應拱
元相池頭竹盡枯
多幸樂天今始病
不知合要苦治無

目昏思寢即安眠
足軟妨行便坐禪
身作醫王心是藥
不勞和扁到門前

交親不要苦相憂亦擬時時強出遊但有
心情何用脚陸乘肩輿水乘舟

送嵩客

登山臨水分無期泉石烟霞今屬誰君到
嵩陽吟此句與教三十六峯知

罷灸

病身佛說將何喻變滅須臾豈不聞莫遣
淨名知我笑休將火艾灸浮雲

賣駱馬

五年花下醉騎行
臨賣迴頭嘶一聲
項籍顧騅猶解歎
樂天別駱豈無情

別柳枝

兩枝楊柳小樓中
嫋娜多年伴醉翁
明日放歸歸去後
世間應不要春風

就煖偶酌戲諸詩酒舊侶

佢屏軟褥卧藤牀
昇向前軒就日陽
一足任他爲外物
三盃自要沃中腸
頭風若見詩應愈
齒折仍誇笑不妨
細酌徐吟猶得

在舊遊未必便相忘

歲暮呈思黯相公皇甫朗之及夢得

尚書

歲暮瞋然一老夫十分流輩九分無莫嫌
身病人扶侍猶勝無身可遣扶

自解

房傳往世爲禪客王道前生應畫師我亦
定中觀宿命多生債負是歌詩不然何故
狂吟詠病後多於未病時

歲暮病懷贈夢得

十年四海故交親零落唯殘兩病身共遣
數奇從是命同教步蹇有何因眼隨老減
嫌長夜體待陽舒望早春新樂堂前舊池
上相過亦不要他人

雪後過集賢裴令公舊宅有感

梁王捐館後枚叟過門時有淚人還泣無
情雪不知臺亭留盡在客賓散何之唯有
蕭條鴈時來下故池

酬夢得貧居詠懷見贈

歲陰生計兩蹉跎相顧悠悠醉且歌
厨冷難留烏止屋門閑可與雀張羅
病添疰舄吟聲苦貪欠韓康藥債多
日望揮金賀新命俸錢依舊又如何

酬夢得見喜疾瘳

暖卧摩絛褥寒傾藥酒螺昏昏布裘底病
醉睡相和末疾徒云爾餘年有幾何
須知差與否相去校無多

夜聞箏中彈瀟湘送神曲感舊

縹緲巫山女歸來七八年殷勤湘水曲留
在十三絃苦調吟還出深情咽不傳萬重
雲水思今夜月明前

感蘇州舊舫

畫梁朽折紅窻破獨立池邊盡日看守得
蘇州船舫爛此身爭合不衰殘

感舊石上字

閑撥船行尋舊池幽情往事復誰知太湖

石上鐫三字十五年前陳結之

見敏中初到邠寧秋日登城樓詩詩
中頗多鄉思因以寄和

想爾到邊頭蕭條正值秋二年貧御史八
月古邠州絲管聞雖樂風沙見亦愁望鄉
心若苦不用數登樓

齋戒

每因齋戒斷葷腥漸覺塵勞染愛輕六賊
定知無氣色三尸應恨少恩情酒魔降伏

終須盡詩債填還亦欲平從此始堪爲弟子竺乾師是古先生

戲禮經老僧

香火一爐燈一盞白頭夜禮佛名經何年飲著聲門酒直到如今醉未醒

近見慕巢尚書詩中屢有歎老思退之意又於洛下新置郊居然寵寄方深歸心太速因以長句戲而諭之

近見詩中歎白鬚遙知閭外憶東都烟霞

偷眼窺來久富貴粘身擺得無新置林園
猶瀼落未終婚嫁且踟躕應須待到懸車
歲然可東歸伴老夫

對鏡偶吟贈張道士抱元

閑來對鏡自思量年自衰殘分所當白髮
萬莖何所恠丹砂一粒不曾嘗眼昏久被
書科理肺渴多因酒損傷今日逢師雖已
晚枕中治老有何方

病入新正

枕上驚新歲花前念舊歡是身老所逼非
意病相干風月情猶在盃觴興漸闌便休
心未伏更試一春看

卧疾來早晚

卧疾來早晚懸懸將十旬婢能尋本草犬
不吠醫人酒甕全生醖歌筵半委塵風光
還欲好爭向枕前春

強起迎春戲寄思黯

杖策人扶廢病身晴和強起一迎春他時

蹇跛縱行得笑殺平原樓上人

夢得前所酬篇有鍊盡美少年之句
因思往事兼詠今懷重以長句答之
鍊盡少年成白首憶初相識到今朝
昔饒春桂長先折今伴寒松最後凋
生事縱貧猶可過風情雖老未全銷
聲華寵命人皆得若箇如君歷七朝

病後寒食

故紗絳帳舊青氍毹藥酒醺醺引醉眠
斗藪

弊袍春晚後摩挲病脚日陽前行無筋力
尋山水坐少精神聽管絃拋擲風光負寒
食曾來未省似今年

老病相仍以詩自解

榮枯憂喜與彭殤都似人間戲一場虫臂
鼠肝猶不恠雞膚鶴髮復何傷昨因風發
甘長往今遇陽和又小康還似遠行裝束
了遲迴且住亦何妨

皇甫郎中親家翁赴任絳州宴送出

城贈別

慕賢入室交先定結援通家好復成新婦
不嫌貪活計嬌孫同慰老心情洛橋歌酒
今朝散絳路風烟幾日行欲識離群相戀
意爲君扶病出都城

春暖

風痺宜和暖春來脚校輕鶯留花下立鶴
引水邊行髮少嫌巾重顏衰訝鏡明不論
親與故自亦昧平生

殘春晚起伴客笑談

掩戶下簾朝睡足一聲黃鳥報殘春披衣
岸幘日高起兩角青衣扶老身策杖強行
過里巷引盃閑酌伴親賓莫言病後妨談
笑猶恐多於不病人

送唐州崔使君侍親赴任

連持使節歷專城獨賀崔侯最慶榮烏府
一拋霜簡去朱輪四從板輿行發時正許
沙鷗送到日方乘竹馬迎唯慮郡齋賓友

少數盃春酒共誰傾

春晚詠懷贈皇甫朗之

艷陽時節又蹉跎
遲暮光陰復若何
一歲中分春日少
百年通計老時多
多中更被愁牽引
少裏兼遭病折磨
賴有銷憂治悶藥
君家濃酎我狂歌

春盡日宴罷感事獨吟

五年三月今朝盡
客散筵空獨掩扉
病與樂天相伴住
春隨樊子一時歸
閑聽鶯語

移時立思逐楊花觸處飛金帶縫罽衫委
地年年衰瘦不勝衣

病中辱崔宣城長句見寄兼有醵綺
之贈因以四韻摠而酬之

劉楨病發經春卧謝朓詩來盡日吟三道
舊誇收片玉一章新喜獲雙金信題霞綺
緘情重酒試銀觥表分深科第門生滿霄
漢歲寒少得似君心

前有別柳枝絕句夢得繼和云春盡

絮飛留不得隨風好去落誰家又復

戲答

柳老春深日又斜任他飛向別人家誰能
更學孩童戲尋逐春風捉柳花

池上早夏

水積春塘晚陰交夏木繁舟船如野渡籬
落似江村靜拂琴牀席香開酒庫門慵閑
無一事時弄小嬌孫

談氏外孫生三日喜是男偶吟成篇

兼戲呈夢得

玉牙珠顆卜男兒羅薦蘭湯浴罷時
芣苢春來盈女手梧桐老去長孫枝
慶傳媒氏鸞先賀喜報談家烏預知
明日貧翁具雞黍應須訓賽引鵲詩

開成太皇太后挽歌詞四首

御宇恢皇化傳家叶至公
華夷臣妾內堯舜弟兄中
制度移氓俗文章變國風
開成與貞觀實錄事多同

又一首

晏駕辭雙闕靈儀出九衢上雲歸碧落下
席葬蒼梧奠晚餘堯曆龜新啓夏圖三朝
聯棣萼從古帝王無

又一首

嚴恭七月禮哀慟萬人心地感騰秋氣天
愁結夕陰鼎湖龍漸遠濛汜日初沉唯有
雲韶樂長留治世音

又一首

化成同軌表清平恩結連枝感聖明帝與
九齡雖吉夢山呼萬歲是虛聲月低儀仗
辭蘭路風引笳簫入柏城老病龍髯攀不
及東周退傅最傷情

時熱少見客因詠所懷

冠櫛心多懶逢迎興漸微况當時熱甚幸
遇客來稀濕灑池邊地涼開竹下扉露牀
青篾簟風架白蕉衣院靜留僧宿樓空放
妓歸衰殘強勸宴此事久知非

宣州崔大夫閣老忽以近詩數十首
見示吟諷之下竊有所喜因成長句
寄題郡齋

謝玄暉歿吟聲寢郡閣寥寥筆硯閑無復
新詩題壁上虛教遠岫列窓間忽驚歌雪
今朝至必恐文星昨夜還再喜宣城章句
動飛觴遙賀敬亭山

足疾

足疾無加亦不瘳
絲春歷夏復經秋
開顏

且酌樽中酒代步多乘池上舟幸有眼前
衣食在兼無身後子孫憂應須學取陶彭
澤但委心形任去留

晚池汎舟遇景成詠贈呂處士

岸淺橋平池面寬飄然輕棹汎澄瀾風宜
扇引開懷入樹礙舟行仰卧看別境客稀
知不易能詩人少詠應難唯憐呂叟時相
伴同把磻溪舊釣竿

夢微之

夜來携手夢同遊晨起盈巾淚莫收漳浦
老身三度病咸陽宿草八迴秋君埋泉下
泥銷骨我寄人間雪滿頭阿衛韓郎相次
去夜臺茫昧得知不

感秋詠意

炎涼遷次速如飛又脫生衣著熟衣遶壁
暗蛩無限思戀巢寒鷺未能歸須知流輩
年年失莫歎衰容日日非舊語相傳聊自
慰世間七十老人稀

老病幽獨偶吟所懷

眼漸昏昏耳漸聾
滿頭霜雪半身風
已將心出浮雲外
猶寄形於逆旅中
觴詠罷來賓閣閉
笙歌散後妓房空
世緣俗念消除盡
別是人間清淨翁

和楊尚書罷相後夏日遊永安水亭
兼招本曹楊侍郎同行

道行無喜退無憂
舒卷如雲得自由
良冶動時爲括匠
巨川濟了作虛舟
竹亭陰合

偏宜夏水檻風涼不待秋遙愛翩翩雙紫
鳳入同官署出同遊

在家出家

衣食支分婚嫁畢從今家事不相仍夜眠
身是投林鳥朝飯心同乞食僧清唳數聲
松下鶴寒光一點竹間燈中宵入定跏趺
坐女喚妻呼多不應

夜涼

露白風清庭戶涼老人先著夾衣裳舞腰

歌袖拋何處唯對無絃琴一張

繼之尚書自余病來寄遺非一又蒙
覽醉吟先生傳題詩以美之今以此
篇用伸酬謝

衰殘與世日相疎惠好唯君分有餘茶藥
贈多因病久衣裳寄早及寒初交情鄭重
金相似詩韻清鏘玉不如醉傳狂言人盡
笑獨知我者是尚書

五年秋病後獨宿香山寺三絕句

經年不到龍門寺今夜何人知我情還向
暢師房裏宿新秋月色舊灘聲

飲徒歌伴今何在雨散雲飛盡不迴從此
香山風月夜祇應長是一身來

石盆泉畔石樓頭十二年來晝夜遊更過
今年年七十假如無病亦宜休

題香山新經堂招僧

烟滿秋堂月滿庭香花漠漠磬泠泠誰能
來此尋真諦白老新開一藏經

偶題鄧翁

偶因携酒尋村客聊復迴車訪薜蘿宜值
雪寒相慰問不妨春暖更經過翁居山下
年空老我得人間事校多一種共翁頭似
雪翁無衣食又如何

早入皇城贈王留守僕射

津橋殘月曉沈沈風露淒清禁署深城柳
宮槐謾搖落悲愁不到貴人心

寄題廬山舊草堂兼呈二林寺道侶

三十年前草堂主而今雖在鬢如絲登山
尋水應無力不似江州司馬時漸伏酒魔
休放醉猶殘口業未拋詩君行過到鑪峯
下爲報東林長老知

改業

先生老去飲無興居士病來閑有餘猶覺
醉吟多放逸不如禪坐更清虛柘枝紫袖
教丸藥羯鼓蒼頭遣種蔬却被山僧戲相
問一時改業意何如

山下留別佛光和尚

勞師送我下山行
此別何人識此情
我已七旬師九十
當知後會在他生

山中五絕句
遊嵩陽見五物名有

所感感興不同
隨興而吟因成五絕
嶺上雲

嶺上白雲朝未散
田中青麥旱將枯
自生自滅成何事
能逐東風作雨無

石上苔

漠漠班班石上苔幽芳靜綠絕纖埃路傍
凡草榮遭遇曾得七香車輦來

林下樗

香檀文桂苦鵬鑄生理何曾得自全知有
無材老樗否一枝不損盡天年

澗中魚

海水桑田欲變時風濤翻覆沸天池鯨吞
蛟鬪波成血深澗游魚樂不知

洞中蝙蝠

千年鼠化白蝙蝠
黑洞深藏避網羅
遠害全身誠得計
一生幽暗又如何

自戲三絕句
閑卧獨吟無人訓
聊假身心相戲往
復偶成三章

心問身

心問身云何泰然
嚴冬煖被日高眠
放君快活知恩否
不早朝來十一年

身報心

心是身王身是宮
君今居在我宮中
是君

家舍君須愛何事論恩自說功

心重答身

因我踈慵休罷早遣君安樂歲時多世間
老苦人何限不放君閑奈我何

會昌元年春五絕句

病後喜過劉家

忽憶前年初病後此生甘分不銜盃誰能
料得今春事又向劉家飲酒來

贈舉之僕射

雞毬餠粥屢開筵談笑謳吟間管絃一月
三迴寒食會春光應不負今年

盧尹賀夢得會中作

病聞川守賀筵開起伴尚書飲一盃任意
少年長笑我老人自覓老人來

題朗之槐亭

春風可惜無多日家醞唯殘軟半瓶猶望
君歸同一醉籃舁早晚入槐亭

勸夢得酒

誰人功畫麒麟閣何客新投魑魅鄉兩處
榮枯君莫問殘春更醉兩三場

過裴令公宅二絕句

風吹楊柳出牆枝憶得同歡共醉時每到
集賢坊北過不曾一度不低眉

梁王舊館雪濛濛愁殺鄒枚二老翁假使
明朝深一尺亦無人到兔園中

百日假滿少傅官停自喜言懷

長告今朝滿十旬從茲蕭灑便終身老嫌

手重拋牙笏病喜頭輕換角巾
疏傳不朝懸組綬尚平無累畢
婚姻人言世事何時了我是人間
事了人

旱熱

畏景又加旱火雲殊未收籬暄
飢有雀池涸渴無鷗岸幘頭仍
痛褰裳汗亦流若爲當此日遷
客向炎洲

題崔少尹上林坊新居

坊靜深居新且幽忽疑縮地到
滄洲宅東

籬缺嵩峯出堂後門開洛水流高下三層
盤野徑沿洄十里汎漁舟若能爲客烹雞
黍願伴田蘇日日遊

新澗亭

煙蘿初合澗新開閑上西亭日幾迴老病
歸山應未得且移泉石就身來

對酒有懷寄李十九郎中

往年江外拋桃葉去歲樓中別柳枝寂寞
春來一盃酒此情唯有李君知吟君舊句

情難忘風月何時是盡時

楊六尚書頻寄新詩詩中多有思閑
相就之志因書鄙意報而諭之

君年殊未及懸車未合將閑逐老夫身健
正宜金印綬位高方稱白髭鬚若論塵事
何由了但問雲心自在無進退是非俱是
夢丘中闕下亦何殊

偶吟自慰兼呈夢得

且喜同年滿七旬莫嫌衰病莫嫌貧已爲

海內有名客又占世間長命人耳裏聲聞
新將相眼前失盡故交親尊榮富壽難兼
得閑坐思量最要身

寄潮州繼之

相府潮陽俱夢中夢中何者是窮通他時
事過方應悟不獨榮空辱亦空

雪暮偶與夢得同致仕裴賓客王尚
書飲

黃昏慘慘雪霏霏白首相歡醉不歸四箇

老人三百歲人間此會亦應稀

雪朝乘興欲詣李司徒留守先以五
韻戲之

寒夜生酒思曉雪引詩情熱飲一兩盞冷
吟三五聲鋪花憐地凍銷玉畏天晴好拂
烏巾出宜披鶴氅行梁園應有興無不召
鄒生

贈思黯

爲憐清淺愛潺湲一日三迴到水邊若道

歸仁灘更好主人何故別三年

聽歌六絕句

聽都子歌

都子新歌有性靈一聲格轉已堪聽更聽
唱到常娥字猶有樊家舊典刑

樂世

管急絃繁拍漸稠綠甃宛轉曲終頭誠知
樂世聲聲樂老病人聽未免愁

水調

五言一遍最殷勤調少情多似有因不會
當時翻曲意此聲腸斷爲何人

想夫憐

玉管朱絃莫急催客聽歌送十分盃長愛
夫憐第二句請君重唱夕陽開

何滿子

世傳滿子是人名臨就刑時曲始成一曲
四詞歌八疊從頭便是斷腸聲

離別難詞

綠楊陌上送行人馬去車廻一望塵不覺
別時紅淚盡歸來無可可霑巾

閑樂

坐安卧穩輦平肩倚杖披衫遶四邊空腹
三盃卯後酒曲肱一覺醉中眠更無忙苦
吟閑樂恐是人間自在天



